

JAKUPOVIĆ, Sanel, ekonomista, vanredni profesor (6. maj 1975, Prijedor). – Srednju školu završio je u rodnom gradu. Diplomirao je 2001. na Mašinskom fakultetu u Zenici. Na Fakultetu poslovne ekonomije Panevropskog univerziteta „Apeiron“ magistrirao je 2007. odbranom rada Uvođenje fleksibilnih modela funkcija planiranja, upravljanja i nadzora investicijskih procesa i njihov uticaj na optimalno donošenje odluka i doktorirao 2009. odbranom teze Unapređenje i razvoj savremenog carinskog sistema Bosne i Hercegovine u procesu integracija u Evropsku uniju. Na istom fakultetu biran je u zvanje docenta 2009. i vanrednog profesora 2014. godine.

Do 2010. radio je u Upravi za indirektno oporezivanje BiH u Banjoj Luci i kao predstavnik te institucije učestvovao u radu carinskih stručnih tijela Svjetske carinske organizacije i Evropske komisije u Briselu. Od 2010. zaposlen je na Panevropskom univerzitetu „Apeiron“ u Banjoj Luci, na kojem je od 2011. urednik naučnog časopisa za ekonomiju i tržišne komunikacije „EMC REVIEW“, od 2013. dekan Fakulteta poslovne ekonomije, a od 2016. direktor Naučno-istraživačkog instituta. Osnivač je i predsjednik Organizacionog odbora Međunarodne naučne konferencije o ekonomskom razvoju i životnom standardu „EDASOL“ (od 2011). Predaje i na Ekonomskom fakultetu u Zagrebu (2018). Član je i urednik nekoliko naučnih i stručnih časopisa u zemlji i inostranstvu, osnivač i član odborâ međunarodnih i domaćih naučnih i poslovnih konferencija, učesnik u procesu unapređenja i osiguranja kvaliteta u visokom obrazovanju u BiH. Osnivač je grupacije Biznis forum bosanskohercegovačke dijaspore – „BHdiaFor“ (od 2013). Predsjednik je Upravnog odbora Fondacije za stipendiranje učenika i studenata „Idriz Jakupović“ (od 2014).

Do 2019. objavio je šest univerzitetskih udžbenika, 36 naučnih radova iz oblasti ekonomije i 41 stručni rad iz oblasti carina.

VAŽNIJI RADOVI: Mikroekonomija (koautor), Banja Luka 2010; Testing of macroeconomic capacities on NUTS III level – Croatia case (koautor), Absorption capacity of EU pre-accession programs in the Western Balkan countries, Nica 2014, 447–455; Upravljanje projektima (koautor), Banja Luka 2016; Credit risk management in the secondary market for automotive parts in the Republic of Croatia, Zbornik radova Ekonomskog fakulteta Sveučilišta u Mostaru, No. Special Issue 2017, Mostar 2017, 133–147; Ethics in Finance in Emerging Markets (koautor), Regulations and Applications of Ethics in Business Practice, Singapore 2018, 165–205.